



N°1352
Entrée le 14.10.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 15.10.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 14/10/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.

An der parlamentarescher Fro n°3987 vum 30. Mäerz 2021 huet den honorabelen Deputéierte Goergen d'Problematik vun Zwangsbestietnesser zu Lëtzebuerg ugeschwat. Hien huet ënner anerem drop higewisen, dass et zu Lëtzebuerg aktuell nach net genuch Méiglechkeete gëtt, fir Mënsche virun Zwangs- a Kannerbestietnesser ze schützen. D'Äntwert vun der Regierung huet zwar op verschidde bestoend Moosname verweisen, awer et bleift d'Fro, ob dës Efforten duer ginn, fir dësem komplexen an dacks verstoppte Problem entgéintzewierken.

Doriwwer eraus huet den Ombudsman fir Kanner a Jugendlecher (OKAJU) a sengem Rapport vun 2022 op d'Risiko vun Zwangsbestietnesser zu Lëtzebuerg opmierksam gemaach. Dëst ënnersträicht d'Drénglechkeet, datt mir als Gesellschaft a politesch Verantwortlecher dëser Problematik méi Opmierksamkeet widmen an effektiv Léisungen entwéckelen. Et ass wichteg, datt mir all eis Institutiounen - vun der Schoul iwwer d'Asylservicer bis hin zu eise Geriichter - besser equipéieren, fir dës Fäll ze erkennen, ze verhënneren an d'Affer adequat ze schützen.

An deem Zesammenhang wéilt ech dem Minister dës Froe stellen:

1. Wéi eng Preventiounsmechanisme gëtt et aktuell an de Lëtzebuerger Schoulen, fir Schüler:innen iwwer Zwangsbestietnesser an hir Rechter opzeglären?
2. Wéi ginn d'Enseignanten an d'Schoulpersonal geschoult, fir potenziell Fäll vun Zwangsbestietnesser ze erkennen an adequat ze reagieren?
3. Wéi eng spezifesch Ënnerstëtzung kréie Schülerinnen, déi Affere oder potenziell Affere vun Zwangsbestietnesser sinn?

Mat déiwem Respekt,



www.piraten.lu



CLEMENT Sven
Deputéierten





Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 1352 vum honorabelen Deputéierte Sven Clement

Ad 1) an 3)

Am Lycée kënnen d'Schüler op d'Offer vum Service psycho-social et d'accompagnement scolaires (SePAS) a vum Service socio-éducatif (SSE) zeréckgräifen. Hei sti Psychologen, Assistants sociaux, Sozialpädagogen an Erzéier zur Verfügung, fir si an hire perséinlechen oder familiäre Situatiounen ze begleeden an hinnen zur Säit ze stoen. Dës Offer gëllt och fir Schüler aus de Classes d'accueil, déi grad eréischt an d'Land komm sinn. Iwwer de Service de l'intégration et de l'accueil scolaires (SIA) gi Médiateurs interculturels an der Schoul agesat fir déi Schüler, déi d'Sprooche vum Land nach net beherrschen.

D'Mataarbechter vun deenen uewe genannte Servicer sinn ausgebild an der Präventioun an an der Interventioun ronderëm d'Thematike vu mentaler Gesondheet, Sucht, Gewalt a Mobbing, affektiver a sexueller Gesondheet an dem Konsum vun den digitale Medien. Des Weideren ass et hir Aufgab, fir Elteren- a Familljenaarbecht ze maachen, jee no Besoin vun deene Jonken. Si schaffen och enk mat externen Hëllefsservicer zesummen, wéi ënner anerem de Servicer vun der Aide à l'enfance, dem Pouvoir judiciaire, der Police grand-ducale, an de Servicer fir Fraen an Nout.

Des Weideren ass 2023 per Gesetz d'Funktoun vum Délégué à la protection des élèves (DPE) an de Lycéeën agefouert ginn. Den DPE schafft Hand an Hand mat allen Acteuren aus der Schoulcommunitéit, Erwuessener wéi och Schüler, a setzt sech fir d'Promotioun vun de Kannerrechter an. Den DPE bitt Ënnerstëtzung beim Traitement vu Situatiounen, an deenen de Jugendschutz gefäerdet ass souwéi och eng Berodung a Begleedung bei Plainten a Signalementen.

Wat déi legal Instrumenter betrëfft, déi de Schülerinnen a Schüler zur Verfügung stinn, verweisen ech op déi gemeinsam Äntwert vun der Justizministesch an der Ministesch fir Gläichstellung an Diversitéit op d'parlamentaresch Fro Nr. 1354. Doriwwer eraus fannen d'Schüler um Referenzsite violence.lu wichteg Informatiounen iwwer de legale Kader an iwwer déi verschidden Hëllefsservicer.

Ad 2)

Am IFEN ginn et weeder am Stage nach an der Formation continue am Moment Angeboter, déi sech explizit an exklusiv mat deem Thema beschäftegen. Allerdéngs gëtt et eng ganz Rei vu Formatiounen, déi indirekt mat deem Thema zesummenhänken, well se dat edukatiivt Personal an d'Enseignantë sensibiliséieren an hinnen hëllef, Verdachtsfäll eventuell ze erkennen.

Formatioune wéi „La maltraitance et si on en parlait, ... ?“, „Jugendschutz“, „Einführung in das Fach VieSo“, „Ech sinn de Chef vu mengem Kierper!“ a Formatiounen am Zesummenhang mat sexueller

Bildung sinn esou Beispiller. An de leschten dräi Joer hu ronn 400 Enseignanten u sou Formatiounen deelgeholl.

Lëtzebuerg, den 19. November 2024

De Minister fir Educatioun,
Kanner a Jugend

(s.) Claude MEISCH